



Asembleia Jerál

Distr.: Jerál
3 Janeiru 2012

Orijinál: Inglés

Konsellu Direitus Umanus
Sesaun ba dala sanulu-resin-sia
Item 6 hosi Ajenda
Revizaun Periódika Universál

Relatóriu hosi Grupu Traballu kona-ba Revizaun Periódiku Universál*

Timor-Leste

* Aneksu ba relatóriu ida-ne'e sirkula hanesan simu nia.

Konteúdu

| | <i>Parágrafu</i> | <i>Pájina</i> |
|--|------------------|---------------|
| Introdusaun..... | 1–4 | 3 |
| I. Rezumu kona-ba prosesu prosedimentu revizaun nian | 5–76 | 3 |
| A. Aprezentasaun hosi Estadu ne'ebé halo revizaun ba | 5–24 | 3 |
| B. Diálogu interativu no resposta hosi Estadu ne'ebé halo revizaun ba | 25–76 | 6 |
| II. Konkluzaan no/ka rekomendasaun | 77–81 | 14 |
| Aneksu | | |
| Kompozisaun delegasaun nian | | 23 |

Introdusaun

1. Grupu Traballu kona-ba Revizaun Periódika Universál (Universal Periodic Review (UPR)), ne'ebé harii tuir Konsellu Direitus Umanus nia rezolusaun 5/1, 18 Juñu 2007, hala'o ninia sesaun ba dala sanulu-resin-rua entre 3-14 Outubru 2011. Revizaun Timor-Leste nian hala'o iha sorumutu ba dala sanulu-resin-lima, iha 12 Outubru 2011. Ministra da Justiça, Sra. Lucia Maria Brandão F. Lobato mak lidera delegasaun Timor-Leste. Iha ninia sorumutu ba dala sanulu-resin-sia, ne'ebé hala'o iha 14 Outubru 2011, Grupu Traballu ne'e adota relatóriu kona-ba Timor-Leste.
2. Iha 20 Juñu 2011, Konsellu Direitus Umanus hili grupu *rapporteur* ida (troika) tuir mai ne'e atu fasilita revizaun ba Timor-Leste: Romenia, Jordania no Chile.
3. Tuir parágrafu 15 hosi aneksu ba rezolusaun 5/1, sira emite dokumentu sira tuir mai ne'e hodi halo revizaun Timor-Leste nian:
 - (a) Relatóriu nasionál ida ne'ebé submete ona/aprezentasaun eskrita ne'ebé halo tuir parágrafu 15 (a) (A/HRC/WG.6/12/TSL/1);
 - (b) Kompilasaun ida ne'ebé prepara hosi Gabinete Altu Komisáriu Nasoins Unidas ba Direitus Umanus (Office of the United Nations High Commissioner for Human Rights (OHCHR)) tuir parágrafu 15 (b) (A/HRC/WG.6/12/TSL/2);
 - (c) Rezumu ida ne'ebé prepara hosi OHCHR, tuir 15 (c) (A/HRC/WG.6/12/TSL/3).
4. Lista ida ho pergunta hosi Canada, Repúblika Czech, Dinamarca, Irlanda, Olanda, Noruega, Slovenia no Reino Unido da Grã-Bretanha no Irlanda Norte, ne'ebé prepara uluk tiha hodi hato'o ba Timor-Leste liu hosi troika. Bele haree pergunta hirak ne'e iha UPR nia extranet.

I. Rezumu kona-ba prosedimentu prosesu revizaun nian

A. Aprezentasaun hosi Estadu ne'ebé halo revizaun ba

5. Timor-Leste afirma katak nia orgullu ho ninia prezensa iha Konsellu Direitus Umanus atu apresenta ninia relatóriu iha revizaun periódika universál nia ámbitu. Nia fó hanoin kona-ba konkluzaun sira iha relatóriu ne'e, ne'ebé Timor-Leste afirma katak, iha ninia esénsia no dimensaun hotu-hotu, luta ne'ebé povu Timor-Leste halo hodi maña 'an ninia independénsia ne'e luta ida ba direitus umanus.
6. Atu tau situasaun ida agora ne'e iha kontestu, Timor-Leste hanoin hikas ninia istória no mós katak liu tiha rezisténsia durante tinan 24 nia laran nia sei selebra iha 2012 tinan sanulu nu'udar nasaun independente. Nia mós fó hanoin katak iha 1975, liu tiha tinan 400 iha Portugal nia ukun, Timor-Leste deklarara unilateralmente ninia independénsia. Nia observa katak molok independénsia ne'e atu hetan rekoñesimentu, Indonesia invade no integra nasaun ne'e, loke dalan ba violasaun direitus umanus iha fatin barabarak, hanesan nota iha parte interesadu sira-nia rezumu. Iha 1999, liu tiha rezisténsia ida ne'ebé envolve atór oin-oin, Nasoins Unidas hala'o referendu ida, ne'ebé 78.5% populasaun vota ba independénsia. Liu tiha referendu ne'e, mosu konflitu lubuk ida hosi grupu armadu sira (milísia pro-Indonesia); iha kontestu ida-ne'e, comunidade internasionál intervein no harii Administrasaun Tranzitória Nasoins Unidas nian ba Timor-Leste (United Nations Transitional Administration for Timor-Leste (UNTAET)). Iha Maiu 2002, Timor-Leste deklarara ninia independénsia no iha Setembru 2002 Nasoins Unidas simu nasaun ne'e hanesan Estadu-Membru.

7. Timor-Leste afirma tan katak nia sempre konxiente katak rekoñesimentu Nasoins Unidas nian la'ós *objetivo em si mesmo* (an objective in itself) objetivu ne'e rasik no mós katak ninia afiliasaun iha organizasaun ne'e envolve direitu no obrigasaun, ne'ebé ida ikus ne'e iha relasaun klaru ho promosaun no protesaun ba direitus umanus. Nota katak direitu hirak ne'e iha natureza inter-dixiplinár no inter-dependente, no iha relasaun ho nivel hotu-hotu governu nian. Timor-Leste subliña esforsu boot ne'ebé presiza halo atu bele kumpre objetivu sira ne'ebé nia define rasik.

8. Aleinde ne'e, hatutan tan katak Timor-Leste ezemplu uitoan de'it iha mundu ne'ebé auto-determinasaun povu nian realiza simultánea ente ho konstrusaun Estadu nian, ho baze iha estadu de direitu, prinsípiu democrátiku no respeito ba direitus umanus. Ezemplu ida ne'ebé temi mak konvensaun internasionál lubuk ida kona-ba direitus umanus ne'ebé Timor-Leste ratifika hafoin aprova tiha ninia Konstituisaun.

9. Hanoin hikas katak sei dauk halo de'it tinan sanulu maka maioria infra-estrutura iha nasaun ne'e, tantu Estadu no privadu, rahun tomak. Timor-Leste afirma katak iha kontestu ida-ne'e, ho laran-ksolok boot tebes mak nia apresenta relatóriu nasional, tanba nia konxiente kona-ba saida mak alkansa ona no saida mak sei dauk halo.

10. Tuir mai, Timor-Leste nota katak, iha ninia interkámbiu diplomátiku regular ho nasaun sira seluk no organizasaun internasionál sira no liu-liu hosi prosesu UPR, nia hetan pergunta kona-ba medida sá mak nia atu foti ho relasaun ba violasaun direitus umanus sira ne'ebé akontese durante tempu okupasaun Indonesia nian no sira ne'ebé akontese hafoin referendu.

11. Kona-ba kestaun ida-ne'e, Timor-Leste agrade se ema hotu-hotu nia kontribuisaun no preokupasaun hodi hateten katak ema sira ne'ebé mai iha Konsellu ne'e sai mós vítima iha tempu liu ba no lakon sira-nia lider sira, membru família sira, belun no kampanáriu sira. Nia husu se ema hotu, Timor-Leste no mós comunidade internasionál, preparadu atu foti kestaun ida ne'ebé ema hotu hatene katak akontese ho koluzau hosi nasaun sira seluk. Nia mós husu se ita preparadu atu halo investigasaun ba finansiamentu esternu ba invazaun ne'e no kilat ne'ebé fa'an ba nasaun opresór.

12. Timor-Leste afirma katak hahú hosi independénsia to'o ohin nasaun ne'e, goza ona períodu dame no estabilidade ne'ebé naruk liu. Nia hatutan tan katak situasaun pás sosiál, maske sei dauk metin, bele hetan risku se nasaun ne'e avansa ba oin, iha momentu ida-ne'e, ho akuzasaun hirak ne'e. Timor-Leste ho ninia sociedade presiza kresimentu iha areas oin-oin, molok atu iha pozisaun ida atu enfrenta ninia pasadu istóriu iha maneira ida ne'ebé dignifikadu no korajozu. Nia hatutan tan katak, infelizmente, momentu ida-ne'e seidak to'o. Timor-Leste klarifika katak kona-ba dikotomia opresór/vítima, nia dezenvolve no implementa ona programa oin-oin hodi fó apoiu ba vítima sira liu hosi ninia Lei kona-ba Kombatente, ne'ebé fé pensaun ba antigu kombatente sira, sira-nia faluk no família.

13. Nota mós katak Timor-Leste ho Indonesia halo ona esforsu atu normaliza sira-nia relasaun bilaterál, ne'ebé bazeia ba respeito malu no amizade. Timor-Leste subliña katak nia labele no la devia hirus ka ostiliza ninia viziñu ne'ebé besik liu, no katak nia kria ona mekanizmu ba diálogu diplomátiku ne'ebé sei loke dalan atu ha fitar kanek sira uluk hodi loke dalan ba futuru ida ne'ebé prometedor.

14. Kona-ba Timor-Leste atu ratifika tan konvensaun no instrumentu internasionál sira direitus umanus nian, relatóriu hateten katak iha jerál Timor-Leste aseita ona konvensaun hirak ne'e ho ratifikasaun ba konvensaun direitus umanus hitu no sira-nia inkorporasaun iha lei nasional. Timor-Leste afirma katak importante liu mak atu implementa, iha maneira ida ne'ebé konsistente ho instrumentu sira ne'ebé ratifika ona, duké atu adere ba konvensaun foun sira.

15. Relatóriu hateten katak prosesu revizaun periódika universál fó ona komprensaun ida di'ak liu ba nasaun ne'e kona-ba ninia situasaun interna iha área direitus umanus. Liu hosi kriasaun ekipa ida ne'ebé kompain hosi funsióariu no espesialista sira hosi ministériu no organizaun nasionál sira, iha Ministério da Justiça nia koordenaun okos, halo ona análize kolektiva ida ne'ebé envolve sociedade sivíl. Prosesu ne'e loke dalan ba nasaun ne'e atu haree katak agora nia preparadu di'ak liu atu hasoru dezafiu sira ne'ebé sei iha.

16. Timor-Leste manifesta ninia laran-ksolok ho nasaun hirak ne'ebé hato'o sira-nia pergunta ho antesedénsia. Nia hein katak sesaun revizaun UPR sei fó tulun atu klarifika situasaun direitus umanus iha nasaun ne'e.

17. Afirma dala ida tan katak iha ninia faze desenvolvimentu ida agora ne'e, Timor-Leste laiha kapasidade finanseira ka téknika atu atende problema hotu-hotu ne'ebé nia hasoru. Temi kestaun sira kadru legál nasaun ne'e nian hanesan ezemplu, nia argumenta katak dala barak kestaun hirak ne'e la tradús iha violasaun ba direitus umanus.

18. Timor-Leste hatutan tan katak difisil tebetebes atu rezolve iha tempu badak nia laran problema hotu-hotu ne'ebé mosu bainhira harii Estadu, nu'udar baze sosiál, iha populasaun ida ho karaterístika sosiál no ekonómiku hanesan Timor-Leste. Kona-ba ne'e, nasaun ne'e fó ona prioridade ba kapasitasaun no halo mós planu iha nivel infra-estrutura bázika no mós iha parte desenvolvimentu sosiál no ekonómiku.

19. Timor-Leste hateten katak foin agora de'it mak asaun hosi governu tuituir malu mak hahú atu fó rezultadu. Nia hatutan tan katak comunidade internasionál tenke hatene katak atu forma doutór, juis no professor presiza tempu.

20. Timor-Leste subliña katak iha tinan tolu liu ba nia simu apoiu hosi nasaun doador no ajénsia internasionál barak, ho papél espesial ba Nasoins Unidas. Nia hatutan tan katak kolaborasaun util ida-ne'e loke ona dalan ba atór polítiku oin-oin, ofisial públiku sira no atór sira iha setór seguransa nian atu halo sensibilizasaun kona-ba direitus umanus.

21. Aleinde ne'e, nia hatutan tan katak Timor-Leste halo ona servisu hamutuk ho Misaun Integrada Nasoins Unidas nian ba Timor-Leste (United Nations Integrated Mission in Timor-Leste (UNMIT)), liu-liu ho ninia Unidade Direitus Umanus, hodi promove edukasaun iha populasaun nia leet kona-ba saida mak labele tolera iha área protesau ba dignidade ema nian.

22. Timor-Leste nota katak iha kontestu tranzisaun hosi rejime ditadura ba demokrasia ida ne'ebé harii iha estadu de direitu, la'ós novidade katak sei iha hahalok balu ne'ebé reflète realidade durante tempu okupasaun nian. Maske falta ne'ebé sei iha, Timor-Leste fó hanoin katak dala ruma ema identifika nia hanesan referénsia ba promosaun direitus umanus iha ninia rejiaun.

23. Nota katak nasaun ne'e asiste mudansa lalais, ne'ebé fó benefísiu ba populasaun iha jerál, liu-liu kona-ba asesu universál ba edukasaun, melhoria iha facilidade edukasaun nian, asesu di'ak liu ba servisu saúde nian no kondisaun saneamentu no nutrisaun di'ak no asesu boot liu ba meius komunikaun modernu. Nota mós katak avansu kondisaun ekonómika nian, liu-liu iha fetu nia kondisaun ekonómika, la kleur sei loke dalan ba mudansa gradual iha ema nia atitude no hamenus nune'e kazamentu sedu, hamenus fetu foin sa'e sira husik eskola no violénsia jéneru nian.

24. Atu ramata, Timor-Leste esplika katak la kle'u tan sei hala'o eleisaun prezidensiál no lejizlativa, no fulan ualu ne'ebé mak resin ba Governu ida-ne'e reprezenta períodu ida badak atu nia bele implementa proposta hotu-hotu ne'ebé delegasaun sira seluk hato'o. Nia hatutan tan katak Governu ida agora ne'e iha kometimentu atu fó atensaun sériu ba kestaun sira ne'ebé foti, hodi harii baze ba Governu ne'ebé mai atu dezenvolve nafatin política integrada kona-ba direitus umanus.

B. Diálogo interativu no resposta hosi Estadu ne'ebé halo revizaun ba

25. Durante diálogo interativu, delegasaun 42 halo deklarasaun. Deklarasaun adisionál ne'ebé labele halo durante diálogo interativu ne'e, tanba limitasaun tempu, sei tau iha revizaun periódika universál nia Extranet bainhira disponivel.¹ Bele hetan rekomendasaun sira ne'ebé halo durante diálogo interativu iha relatoriu ida-ne'e nia Seksaun II.

26. **Singapura** nota katak, nu'udar nasaun ida ne'ebé joven tebtebes, Timor-Leste sei hasoru nafatin dezafiu iha ninia prosesu harii nasaun nian, maibe nia hateten katak Timor-Leste foti ona medida positiva atu hasa'e ninia kapasidade, liu-liu iha área edukasaun no saúde. Singapura fó benvindu ba Lei Bázika 2008 kona-ba Edukasaun, ne'ebé sei tulun atu hasa'e nivel edukasaun nian no dezanvolve forsa traballu kualifikadu. Nia fó mós benvindu ba esforsu ne'ebé Timor-Leste halo atu harii Institutu Nasionál Saúde hodi hadia enfermeiru, parteira, farmaséutiku no profesionál laboratóriu sira-nia kualifikasaun, no mós esforsu ne'ebé halo atu kombat moras ne'ebé dahet, liu hosi kampaña sensibilizasaun no melhoramentu ba sistema diagnóstiku no tratamentu. Singapura halo rekomendasaun.

27. **Aljeria** louva Governu foun ne'e nia kometimentu ba konvensaun prinsipál sira direitus umanus nian. Nia apresia progresu ne'ebé halo iha área direitus umanus, seguransa no dezanvolvimentu ekonómiku, ne'ebé hatudu katak hahú iha 2005 to'o ohin halo ona melhoria iha Índise kona-ba Dezanvolvimentu Umanu. Algeria hateten katak susesu iha eleisaun 2012 sei sai hanesan teste determinante ida tan ba demokrasia nia konsolidasaun iha nasaun ne'e. Algeria halo rekomendasaun.

28. **Indonesia** louva esforsu ne'ebé Timor-Leste halo atu estabelese enkuadramentu legál ba direitus umanus no harii mekanizmu oin-oin direitus umanus nian. Nia fó mós benvindu katak Provedoria tama iha consonância ka iha liña ho Prinsípiu Paris nian, no katak Timor-Leste ratifika ona direitus umanus nia instrumentu prinsipál hitu. Nia rekoñese esforsu ne'ebé Timor-Leste halo atu garante liberdade fundamental no asesu ba justisa, saúde no edukasaun. Indonesia halo referénsia ba Timor-Leste nia kometimentu ba kooperasaun entre nasaun rua ne'e no liu-liu fó benvindu ba progresu iha implementasaun ba rekomendasaun sira hosi Comissão de Verdade e Amizade. Indonesia halo rekomendasaun.

29. **Myanmar** manifesta enkorajamentu ho esforsu ne'ebé Timor-Leste halo atu aumenta protesau ba direitu fetu nian no halo referénsia kona-ba instituisaun sira hanesan Komisaun Nasionál Direitus Umanus. Nia fó benvindu ba esforsu ne'ebé Timor-Leste halo ho kampaña sensibilizasaun atu kombat diskriminasaun. Myanmar manifesta ninia komprensau kona-ba dezafiu ne'ebé Timor-Leste hasoru atu enfrenta kestaun dezanvolvimentu nian, maske nune'e nia hakarak haree progresu iha dezanvolvimentu ekonómiku, sosiál no kulturál. Nia halo rekomendasaun ida.

30. **Sri Lanka** nota katak besik populasaun 60% iha Timor-Leste mak tinan 24 mai kraik. Kona-ba ne'e, nia subliña katak importante atu hasa'e nafatin qualidade iha edukasaun no kuidadu saúde nian, no asesu ba servisu hirak ne'e. Nia louva inisiativa nasional atu halakon analfabetizmu no medida sira atu kombat tráfico umanu no asisténsia ba vítima sira. Nia nota progresu signifikativu ne'ebé halo iha setór saúde nian no akordu ne'ebé halo ho Cuba atu halo formasaun ba doutór Timor oan sira. Nia enkoraja atu dezanvolve tan setór edukasaun no saúde nian, no atu foti nafatin medida sira atu halakon kiak. Nia husu atu asegura katak promosaun ba fetu nia direitu sai hanesan objetivu sentrál estratéjia nasional direitus umanus nian.

31. **Tailândia** fó benvindu ba transferénsia responsabilidade seguransa no aplikasaun lei nian hosi UNMIT ba polisia nasional Timor-Leste. Tailândia nota katak falta

¹ Israel, Mexico, Slovakia, Maldivas, Irão (República Islâmica de), Estados Unidos da América, Kyrgyzstan, Albânia, Monaco, Bangladesh, Latvia, Angola, Cabo Verde no Luxemburgo.

dezenvolvimentu infra-estrutura no rekursu umanus iha Timor-Leste impede povu Timor-Leste atu goza ninia direitus umanus tomak. Tailândia nota katak comunidade internasionál iha responsabilidade atu fó liután assisténsia ba Timor-Leste atu nasaun ne'e bele hetan dame no prosperidade. Tailândia fó ona assisténsia ba Timor-Leste nia dezenvolvimentu. Tailândia halo rekomendasau ida.

32. **República Democrática Popular Laos** sente enkorajamentu ho susesu ne'ebé Timor-Leste halo hahú hosi restaurasaun independénsia to'o ohin atu harii sistema jurídiku no estabilidade polítika iha nasaun ne'e. Nia nota katak Timor-Leste halo parte iha instrumentu internasionál prinsipál lubuk ida kona-ba direitus umanus no partisipa iha sira-nia implementasaun. Nia nota katak kooperasaun di'ak ho mekanizmu direitus umanus Nasoins Unidas nian no ho comunidade internasionál sai hanesan garantia ida ba Timor-Leste atu realiza ninia kometimentu atu promove no proteje direitus umanus. Nia halo rekomendasau.

33. **Filipinas** apresia esforsu ne'ebé Timor-Leste halo atu hadi'a kondisaun direitus umanus iha dezafiu ne'ebé nia hasoru nu'udar demokrasia ida ne'ebé foin harii. Filipinas nota katak Timor-Leste halo daudaun servisu kona-ba reforma lejizlativa no nia fiar katak reforma hirak ne'e sei hetan aprovasaun. Filipinas rekoñese medida sira ne'ebé Timor-Leste foti atu responde ba dezafiu sira, liu-liu protesaun ba feto no labarik. Filipinas laran-ksolok katak mortalidade infantíl sai menus iha Timor-Leste no dezenvolvimentu pozitivu ne'ebé Timor-Leste halo atu hadia saúde materna. Filipinas hateten katak nia mantein ninia kompromisu atu fó apoiu ba Timor-Leste iha área ida-ne'e. Nia halo rekomendasau.

34. República Bolivarian da **Venezuela** rekoñese esforsu ne'ebé Timor-Leste halo atu ultrapasa trajédia sira ne'ebé akontese iha tempu uluk. Nia nota katak Timor-Leste hatudu ona ninia kometimentu ba direitus umanus. Venezuela apresia Timor-Leste nia abordajen franka ba dezafiu ne'ebé nia hasoru hodi satisfás ninia populasaun nia nesesidade bázika. Venezuela apresia esforsu ne'ebé Timor-Leste halo atu proporsionál goza kompletu ba direitus umanus, ezemplu harii Provedoria dos Direitos Humanos e Justiça. Venezuela rekoñese realizasaun ne'ebé Timor-Leste hetan iha área direitu sosiál. Venezuela halo rekomendasau ida.

35. **Cuba** nota katak Timor-Leste hasoru dezafiu ne'ebé mosu hosi orden ekonómiku internasionál ne'ebé la justu, maibé hetan ona rezultadu iha setór saúde nian, hanesan hospital no servisu atensaun primária no mós Institutu Nasionál ba Saúde. Nia mós nota progresu kona-ba tratamentu adekuadu ba moras mear-raan, malária no redusaun ba mortalidade infantíl. Nia manifesta laran-ksolok ho kontribuisaun modestu ne'ebé nia fó ba avansu sira-ne'e balu. Nia halo referénsia kona-ba implementasaun ba planu estudu nasional no programa bolsa-estudu ida. Nia halo rekomendasau ida.

36. **Japaun** apresia Timor-Leste nia envolvimentu iha direitus umanus hahú iha ninia independénsia to'o ohin, liu hosi ratifikasaun ba tratadu prinsipál sira, harii instituisaun sira no adota lejizlasaun no polítika ne'ebé iha relasaun ho ne'e no nota katak Japaun fó assisténsia ba kapasitasaun no formasaun. Nia hein katak Timor-Leste sei halo tan esforsu iha área direitus umanus nian. Nia fó benvindu ba estabesimentu kódigu penál, ne'ebé inkorpora padraun internasionál direitus umanus nian, no Planu Estratéjiku ba Setór Justisa. Japaun hatene dezafiu ne'ebé sistema justisa hasoru. Nia louva esforsu ne'ebé halo atu fó edukasaun gratis no universál no atu promove igualdade jéneru. Japaun halo rekomendasau.

37. **Brazil** nota katak ninia relasaun ho Timor-Leste bazeia ba amizade no pasadu komún. Nia nota katak Timor-Leste nia Konstituisaun bazeia ba estadu de direitu no prevee protesaun ba direitus umanus; no nota katak Timor-Leste halo parte iha instrumentu prinsipál barak direitus umanus nian no iha estatutu "A" instituisaun direitus umanus nian. Nia nota katak Brazil fó apoiu ba esforsu ne'ebé Timor-Leste halo atu harii hikas nasaun

ne'e nia instituisaun sira, liu-liu setór edukasaun, agrikultura no justisa. Nia nota dezafiu ne'ebé Timor-Leste hasoru kona-ba labarik sira-nia matríkula no violénsia jéneru nian. Nia subliña iniciativa sira ne'ebé foti kona-ba ai-han iha eskola no polítika kona-ba zero toleránsia ba tratamentu-aat iha eskola. Nia halo rekomendasaun.

38. **Portugal** nota katak liu tiha tinan barak iha terus laran, Timor-Leste foin manan de'it ninia independénsia iha tinan sia liu ba. Nia nota progresu ne'ebé hetan hosi esforsu estraordináriu ne'ebé Timor-Leste halo iha prosesu rekonstrusaun no rekonsiliaaun. Nia subliña katak Timor-Leste bele sente orgullu tanba nia harii ona instituisaun sira, adota lejislasaun no polítika ne'ebé proteje direitus umanus. Nia fó benvindu ba Lei Hasoru Violénsia Doméstika 2010 no husu informasaun kona-ba medida sira iha área ida-ne'e. Nia apresia esforsu ne'ebé Timor-Leste halo atu rezolve número aas hosi kazu violénsia hasoru labarik, hanesan polítika zero-toleránsia, no husu informasaun kona-ba medida adisionál sira. Nia halo rekomendasaun.

39. **França** apresia Timor-Leste nia kometimentu ba instrumentu prinsipál sira direitus umanus nian no ninia kometimentu ba Lei Hasoru Violénsia Doméstika 2010. França iha nafatin preokupasaun ida kona-ba violasaun direitus umanus ne'ebé polísia no forsa armada halo. Nia nota mós impunidade ba ema ne'ebé halo violasaun direitus umanus durante funu ba independénsia. Bazeia ba rekomendasaun hosi Comissão de Acolhimento, Verdade e Reconciliação ho relasaun ba lei kona-ba kompensasaun ba vítima, França husu informasaun kona-ba medida sira ne'ebé mak TL foti atu implementa lei ne'e. Nia halo rekomendasaun.

40. **India** rekoñese dezafiu ne'ebé Timor-Leste hasoru no subliña esforsu ne'ebé nasaun ne'e halo atu estabelese quadru lejislativu ida ba gozu direitus umanus. Nia nota progresu ne'ebé hetan iha prosesu konstrusaun sistema judisiál nian no esforsu ne'ebé Timor-Leste halo iha área saúde nian, edukasaun, habitasaun, kuidadu ba labarik no igualdade jéneru. Nia nota medida sira ne'ebé Timor-Leste foti atu trata kestaun violénsia doméstika nian no enkoraja Timor-Leste atu promulga no implementa lei hodi asegura direitu no oportunidade hanesan ba feto no ba mane. Nia apresia Timor-Leste nia kometimentu ba edukasaun no husu informasaun kona-ba Timor-Leste nia Planu Estratégiku kona-ba Edukasaun.

41. **Mozambique** nota katak Timor-Leste demokrasia ida ne'ebé sei joven, no sei submete hela ba faze rekonstrusaun nasional no konstrusaun institusionál no hasoru dezafiu ne'ebé kompleksu. Nia nota katak Timor-Leste halo ratifikasaun imediata ba Konvensaun Internasionál hitu kona-ba Direitus Umanus no implementa programa iha área saúde nian, edukasaun, jéneru, seguransa ai-han nian, bee-moos no alojamentu ne'ebé desente. Nia fó benvindu ba redusaun iha taxa mortalidade infantil no edukasaun bázika gratuita. Nia husu ba comunidade internasionál atu fó apoiu ba nasaun ne'e. Nia halo rekomendasaun.

42. **Austria** louva grupu traballu inter-ministeriál ne'ebé hala'o sesaun sorumutu ho sociedade sivíl hodi prepara ba revizaun periódika universál. Nia louva esforsu ne'ebé halo atu trata kestaun violénsia doméstika nian, inklui Lei hasoru Violénsia Doméstika, no husu informasaun kona-ba medida sira atu trata problema ne'e, inklui atu konsidera hala'o kampaña nasional ida. Nia husu informasaun kona-ba medida sira ne'ebé mak foti daudaun atu implementa servisu hosi komisaun sira ne'ebé harii atu investiga violasaun direitus umanus entre 1974-1999 no atu responsabiliza autór sira. Nia halo rekomendasaun.

43. **Kamboja** louva esforsu ne'ebé Timor-Leste halo atu tau énfaze ba direitus umanus liu hosi governasaun demokrátika, enkuadramentu legál no estratéjia implementasaun. Nia nota medida sira ne'ebé Timor-Leste foti atu trata direitu feto no labarik nian, liu hosi kriasaun ajénsia nasional ida ba kestaun jéneru nian no polítika sira ne'ebé buka atu promove direitu ba edukasaun no saúde. Nia halo referénsia ba Timor-Leste nia kooperasaun di'ak ho Nasoins Unidas nia sistema no nota mós katak Timor-Leste halo

parte iha instrumentu internasionál barak direitus umanus nian. Nia nota dezafiu ne'ebé Timor-Leste hasoru nu'udar nasaun ki'ik oan ida no halo rekomendasaun.

44. **Nepal** subliña transformasaun polítika, ekonómika no sosiál ne'ebé akontese iha Timor-Leste hahú hosi independénsia to'o ohin no louva Timor-Leste nia envolvimentu iha direitus umanus no nota mós konsolidasaun ne'ebé halo ba estrutura públika sira, no mós institucionalizasaun ba respeito ba direitus umanus no demokrasia. Nia husu ba comunidade internasionál atu fó apoiu, inklui apoiu ba desenvolvimento infra-estrutura nian. Kualkér apoiu internasionál tenke bazeia ba komprensaun totál kona-ba atór, norma no valór lokál. Nepal halo rekomendasaun ida.

45. **República Koreia** apresia dezafiu ne'ebé Timor-Leste, nu'udar demokrasia ida ne'ebé foin harii iha prosesu konstrusaun nasaun nian, hasoru. Nia nota katak nesiedade kona-ba justisa tranzitória ba krime sira uluk apresenta difikuldade adisionál ba Timor-Leste, bainhira nasaun ne'e luta daudaun atu harii sistema justisa ida ne'ebé funksionál. Nia louva Timor-Leste tanba nasaun ne'e harii ona kadru legál nesésáriu no instituisaun judisiál sira. Nia nota liu-liu Lei Protesaun ba Testemuña no Lei hasoru Violénsia Doméstika. Nia halo rekomendasaun.

46. **Timor-Leste** hatán ba pergunta sira ne'ebé ható'o ho antesedénsia no ba pergunta sira ne'ebé mak foti durante diálogu. Ho relasaun ba pergunta kona-ba setór seguransa, liu-liu responsabilizasaun no fiskalizasaun sivíl, Timor-Leste esplika katak Planu ba Tinan Lima hosi Ministériu da Defeza e Seguransa (2007-2011) foka ba reforma setór seguransa nian, liu-liu iha área lejlzasaun no reforma estruturál. Hatutan tan katak konsolidasaun ba kadru legál nasaun ne'e nian representa fatór importante atu kria ambiente ida ne'ebé forsa seguransa sira tenke atua tuir lei no responsavel ba públiku. Nota katak Governu nia kometimentu ba kestaun ida-ne'e konfirma hosi aprovasaun ba Lei Seguransa Nasionál, Lei Defeza no Lei Seguransa Interna.

47. Ho relasaun ba preokupasaun ne'ebé foti kona-ba nivel implementasaun ki'ik ba Polísia Nasionál nia mekanizmu dixiplinár, iha esplikaun ida katak prosesu ida-ne'e hetan ona melloramentu maka'as iha tinan sira liu ba. Timor-Leste apresenta informasaun ho detalhe kona-ba redusaun persentajen hosi kazu sira ne'ebé tama iha arkivu. Nia mós fó informasaun ho detalhe kona-ba medida sira ne'ebé nia adota atu alkansa objetivu ida-ne'e. Aleinde ne'e, Timor-Leste esplika katak Governu mós harii komisaun temporáriu ida atu halo monitorizasaun ba prosesu promosaun nian, ne'ebé halo supervizaun ba konduta dixiplinár hosi polísia sira ne'ebé atu hetan promosaun. Timor-Leste mós fó informasaun ho detalhe kona-ba lejlzasaun ho relasaun ba kazu ida-ne'e no mós ho relasaun ba supervizaun sivíl nia mekanizmu funksionál, inklui Parlamentu no Provedoria nian.

48. Kona-ba kastigu korporál, Timor-Leste lembra katak nia adota ona polítika Zero-Toleránsia no implementa ona medida restrita sira-ne'e, ne'ebé inklui asaun dixiplinár no prosesu kriminál. Kona-ba edukasaun, nia fó informasaun ho detalhe kona-ba medida sira ne'ebé adota iha Planu Estratéjiku ba Edukasaun 2011-2015. Nia hateten katak planu ne'e marka mudansa importante ida tanba tau labarik nia bem-estar fíziku, psikolójiku, sosiál no akadémiku iha sentru tomada desizaun hosi eskola sira. Nia afirma katak Timor-Leste konsidera kastigu korporál hanesan forma tratamentu-aat ida no katak Kódigu Labarik nian, bainhira aprova tiha sei bandu kastigu ida-ne'e iha situasaun ne'ebé de'it. Kona-ba taxa (ka rate) hosi labarik-feto sira ne'ebé husik eskola, Timor-Leste fornese estatística no informasaun ho detalhe kona-ba esforsu ne'ebé nia halo atu hamenus problema ne'e. Timor-Leste hateten katak uluk ensinu báziku obrigatóriu tinan neen, maibé agora sa'e ba tinan sia. Ensину báziku agora sai universál, obrigatóriu no gratuiitu. Nia hatutan tan katak, iha kadru ensinu ida agora ne'e, Timor-Leste hala'o ona programa alfabetizasaun lubuk ida no ho apoiu hosi Governu Cuba hein katak sei implementa mós programa adisionál rua atu kombaté analfabetizmu.

49. Kona-ba kestaun sira ne'ebé iha relasaun ho implementasaun ba rekomendasaun sira hosi Comissão de Acolhimento, Verdade e Reconciliação (CAVR), Timor-Leste lembra katak Komisaun ne'e nia relatóriu iha rekomendasaun liu atus rua (200); hosi número ne'e, 134 dirije ba Estadu nia instituisaun sira iha Timor-Leste ne'ebé 112 hetan ona implementasaun hosi programa dezvoltimentu oin-oin. Programa hirak ne'e inklui melloramentu ba kondisaun iha detensaun laran, ne'ebé oras-ne'e funsiona iha polítika ida ne'ebé nakloke. Hatutan tan ne'e, Governu, hamutuk ho parseiru dezvoltimentu sira no atór sira hosi sociedade sivíl, envolve ona iha diálogu no rekonsiliaun iha nivel komunitáriu ho objetivu atu harii dame. Aleinde ne'e, aprova ona polítika ba juventude; no ho assisténsia hosi nasaun amigu sira, hanesan Cuba no Brazil, implementa ona programa alfabetizasaun iha fatin barak atu halakon analfabetizmu.

50. Timor-Leste retira informasaun kona-ba esforsu ne'ebé nia halo atu halakon violénsia hasoru fetu no atu hadi'a igualdade jéneru. Timor-Leste halo referénsia ba Lei hasoru Violénsia Doméstika, ne'ebé foin hetan promulgasaun, no temi medida sira ne'ebé nia foti ona, inklui medida orsamentál, hodi asegura lei ne'e nia implementasaun. Fó mós informasaun ho detalhe kona-ba esforsu ne'ebé nia halo daudaun kona-ba sensibilizasaun públika. Timor-Leste lembra katak Planu Dezvoltimentu Estratéjiku (2011-2030) identifika hanesan dezafiu boot liu ba igualdade jéneru mak número analfabetizmu aas iha fetu sira-nia leet, violénsia doméstika no taxa mortalidade materna aas, no fó informasaun ho detalhe kona-ba kestaun hirak ne'e. Tuir mai, Timor-Leste esprika asaun ne'ebé nia foti ona atu enfrenta dezafiu hirak ne'e no fó informasaun ho detalhe kona-ba ne'e.

51. Ho relasaun ba pergunta sira ne'ebé foti kona-ba Provedoria, Timor-Leste afirma katak nia valoriza instituisaun ne'e nia servisu no katak órgaun judisiáriu no dixiplinár sira iha Governu nia estrutura oin-oin iha kometimentu atu implementa no akompañia Provedoria nia rekomendasaun. Nia fó informasaun konkreta kona-ba ne'e. Aleinde ne'e, nia hateten katak Governu iha kometimentu atu fó rekursu finanseiru loloos ba Provedoria no katak rejista ona aumentu ida iha rekursu sira ne'ebé nia fó ba Provedoria.

52. **Canada** fó parabéns ba esforsu ne'ebé Timor-Leste halo atu proteje direitos umanus liu hosi kooperasaun ho Sistema Nasoins Unidas, Comissão de Acolhimento, Verdade e Reconciliação no Comissão de Verdade e Amizade. Canada nota progresu ne'ebé halo kona-ba medida sira ne'ebé foti iha nivel seguransa no defeza nian, no adosaun ba Lei hasoru Violénsia Doméstika iha 2010. Nia foti preokupasaun kona-ba vítima sira violénsia doméstika nian ne'ebé la simu justisa loloos no husu ba Timor-Leste atu reforsa protesau ba minoria relijioza sira. Canada halo rekomendasaun.

53. **Vietnam** nota ho laran-ksolok katak, maske hasoru dezafiu, Timor-Leste halo ona esforsu maka'as atu harii ninia kadru institusionál no legál ba protesau direitos umanus no Timor-Leste valoriza toleránsia no rekonsiliaun. Esforsu ne'ebé foin halo atu promove direitu sosiál no ekonómiku, liu-liu iha saúde, edukasaun primária no seguransa sosiál, representa mós sinál ida ne'ebé di'ak. Vietnam halo rekomendasaun.

54. **Malázia** manifesta enkanamentu tanba Timor-Leste harii ona kadru institusionál no legál ne'ebé forte kona-ba direitos umanus, inklui Provedoria dos Direitos Humanos e Justiça ne'ebé hetan akreditasaun ho estatutu "A". Malázia fó benvindu ba esforsu ne'ebé Timor-Leste halo atu adere ba Konvensaun kona-ba Ema Deficiente nia Direitu. Malázia halo rekomendasaun.

55. **Estonia** louva Timor-Leste tanba halo parte iha instrumentu internasionál barak kona-ba direitos umanus no adota lei sira ne'ebé iha relasaun ho direitos umanus. Nia halo referénsia kona-ba prosesu rekonsiliaun ne'ebé la'o daudaun iha Timor-lesté no halo votus atu nasaun ne'e hetan susesu iha área ida-ne'e. Nia nota ninia envolvimentu iha tempu uluk hodi harii Servisu Estranjeiru no halo monitorizasaun ba eleisaun iha Timor-

Leste no hateten katak nia sei akompaña nafatin dezvoltimentu iha nasaun ne'e. Nia halo rekomendasau.

56. **Irlanda** fó benvindu ba prosesu konsulta ne'ebé Timor-Leste hala'o hodi prepara ninia UPR no nota katak nasaun ne'e enfrenta dezafiu hahú hosi independénsia to'o ohin atu harii estrutura administrativu no kria kultura respeito ba direitos umanus. Nia fó benvindu ba órgaun nasional independente ne'ebé harii atu proteje direitos umanus no Comissão Anti-Corrupção. Nia fó benvindu ba Lei Bázika kona-ba Edukasaun no nota katak nasaun ne'e enfrenta daudaun dezafiu atu garante bee-moos no saneamentu. Nia nota katak comunidade internacional tenke halo nafatin parseria ho Timor-Leste. Nia halo rekomendasau.

57. **China** apresia esforsu ne'ebé Timor-Leste halo hodi proteje direitos umanus no adere ba tratadu prinsipál sira direitos umanus nian. Nia nota esforsu ne'ebé Timor-Leste halo atu promove empregu, kuidadu saúde nian no edukasaun, no atu salva guarda fornimentu báziku ai-han nian, bee-moos no habit asaun; no mós atu asegura protesau ba grupu vulneravel sira. China komprende dezafiu ne'ebé Timor-Leste hasoru kona-ba dezvoltimentu sosial no ekonómiku no protesau ba direitos umanus, no hein katak comunidade internacional sei fó nafatin asisténsia.

58. **Polónia** fó parabéns ba progresu ne'ebé Timor-Leste halo hahú hosi independénsia to'o ohin iha área dezvoltimentu sosial no direitos umanus. Nia nota ho laran-ksolok instituisau oin-oin ne'ebé harii no lejlzasaun no polítika ne'ebé halo iha área ida-ne'e. Nia fó benvindu ba Timor-Leste nia kooperasaun ho sistema Nasoins Unidas nian. Nia nota ho preokupasaun katak Timor-Leste sei dauk halo parte iha tratadu prinsipál balu kona-ba direitos umanus no preokupasaun kona-ba obstákulu sira ne'ebé impede justisa ida ne'ebé justu no oportunu. Nia halo rekomendasau.

59. **Noruega** louva esforsu ne'ebé Timor-Leste halo hodi adere ba lei internacional prinsipál sira kona-ba krime no padraun internacional direitos umanus nian no inkorpora instrumentu hirak ne'e iha ninia lejlzasaun nasional. Nia fó benvindu ba kriasaun Komisaun Nasional kona-ba Direitu Labarik nian no subliña katak importante atu iha setór justisa ida ne'ebé metin no forte. Nia halo rekomendasau.

60. **Australia** nota katak Timor-Leste asina ona tratadu direitos umanus barak. Timor-Leste buka atu adota no implementa Kódigu Sivil, Kódigu Labarik nian no Lei Propriedade. Nia enkoraja Timor-Leste atu konsidera ratifikasaun ba CRPD no atu servisu hamutuk ho Provedoria hodi implementa liután ninia rekomendasau sira. Nia fó benvindu ba Komisaun Nasional kona-ba Direitu Labarik nian no esforsu ne'ebé halo atu hasa'e asesu ba edukasaun. Nia manifesta preokupasaun kona-ba violénsia doméstika no enkoraja atu tau rekursu sira, formasaun no atu hasa'e fetu nia asesu ba sistema justisa formál. Nia louva servisu ne'ebé Timor-Leste halo kona-ba rekonsiliau no forsa polisia nia responsabilizasaun. Nia halo rekomendasau.

61. **Itália** manifesta apoiu ba konstrusaun demokrasia iha Timor-Leste no fiar katak UPR representa oportunidade ida atu identifika área ne'ebé mak comunidade internacional bele fó kontribuisau. Itália fó benvindu ba Konstituisau no ba Timor-Leste nia adezaun iha instrumentu sira direitos umanus nian. Italia enkoraja Timor-Leste atu koopera nafatin ho Nasoins Unidas. Itália nota katak violénsia doméstika sei akontese iha fatin barak no sei iha nafatin lei no prátika diskriminatória. Itália enkoraja Timor-Leste atu kompleta reforma ba sistema justisa nian. Itália husu informasaun kona-ba programa sira ne'ebé inkorpora edukasaun direitos umanus iha eskola primária no kona-ba akompañamentu ba edukasaun direitos umanus. Italia halo rekomendasau.

62. **Alemaña** husu oinsá mak Timor-Leste hanoin atu halo hodi akompaña rekomendasau sira hosi Komisaun Verdade rua no se Timor-Leste hanoin ona atu harii programa reparasaun ida ba vítima sira, sentru memorial ka rejistu públiku kona-ba ema ne'ebé lakon. Alemaña fó benvindu ba asesu ba justisa ne'ebé sai nu'udar Timor-Leste nia prioridade ida

iha Setór Justisa. Alemanha louva Timor-Leste kona-ba adosaun ba Lei hasoru Violénsia Doméstika. Nia nota katak violénsia doméstika akontese iha fatin barak no autoridade sira dala barak la fó responde loloos ba problema ne'e. Alemanha halo rekomendasaun.

63. **África do Sul** nota katak Timor-Leste ratifika ona instrumentu internasionál barak kona-ba direitus umanus no inkorpora ona dispozisaun sira hosi tratadu hirak ne'e iha ninia lejlzasaun nasional. África do Sul husu se Timor-Leste konsidera ona atu husu asisténsia téknika hodi ultrapasa dezafiu sira iha parte rekursu umanus sira no kondisaun institusionál. África do Sul nota katak Timor-Leste define hela polítika nasional ida atu implementa direitus ba ema deficiente sira no konsidera atu ratifika CRPD. Nia husu informasaun kona-ba medida sira ne'ebé mak Timor-Leste foti atu rezolve diskriminasaun ne'ebé ema deficiente sira hasoru. África do Sul halo rekomendasaun.

64. **Marrocos** salienta Timor-Leste nia ratifikasaun ba instrumentu prinsipál sira direitus umanus nian. Marrocos fó benvindu ba Timor-Leste nia vontade atu hametin tribunal no instituisaun judisial sira, hanesan prevee iha planu estratéjiku ba setór justisa nian, no atu hametin programa sira ne'ebé nia kria atu halakon kiak no promove asesu ba servisu públiku, biar difikuldade oin-oin. Nia husu informasaun adisiona kona-ba programa formasaun ba pesoál iha área profisaun jurídika. Kona-ba ne'e, Marrocos afirma dala ida tan ninia apoiu ba Timor-Leste atu promove direitus umanus, liu hosi asisténsia financeira no téknika. Nia halo rekomendasaun ida.

65. **Argentina** rekoñese esforsu ne'ebé Timor-Leste halo iha área institusionál no lejlzativa, ho kooperasaun Nasoins Unidas nian, ne'ebé loke dalan atu bele prepara polítika kona-ba promosaun no protesauun ba direitus umanus. Argentina halo rekomendasaun.

66. **Reino Unido da Grã-Bretanha no Irlanda Norte** fó benvindu ba Lei hasoru Violénsia Doméstika no enkoraja medida sira atu hasa'e konxiénsia pública. Nia halo referénsia ba informasaun katak forsa seguransa halo tratamentu-aat no uza forsa maka'as liu no enkoraja mekanizmu responsabilizasaun iha forsa seguransa. Nia fó benvindu ba progresu ne'ebé Timor-Leste halo atu hadi'a asesu ba justisa, maibé nia rekoñese katak iha limitasaun. Nia enkoraja Timor-Leste atu hametin ninia instituisaun judisial sira no atu mantein polítika kona-ba lingua atu permite asesu ba justisa no edukasaun. Nia halo rekomendasaun.

67. **Ungria** nota ho laran-ksolok katak tratadu internasionál direitus umanus barak mak Timor-Leste ratifika ona no nia fó benvindu ba akreditasaun estatutu "A" ne'ebé Provedoria hetan. Ungria nota katak kastigu korporál sei akontese iha eskola sira maske polítika zero-toleránsia ne'ebé iha. Nia fó parabéns ba Timor-Leste tanba promulga lei hodi bandu kastigu korporál, maibé nia sente katak prezisa foti tan medida sira hodi implementa lei ne'e. Ungria halo referénsia ba dispozisaun spesífika kooperasaun nian iha lei ne'ebé implementa Estatutu Roma. Nia nota katak destruisaun ba Estadu nia infra-estrutura sira durante referendu 1999 afeta sistema judisial. Ungria halo rekomendasaun.

68. **Santa Sé** fó benvindu ba esforsu ne'ebé Timor-Leste halo atu harii nasaun ida ho baze iha respeito ba estadu de direitu no protesauun ba direitus umanus. Nia halo referénsia ba ratifikasaun ne'ebé Timor-Leste halo ba konvensauun direitus umanus hitu no Protokolu Opsional sira ne'ebé tama ona iha lejlzasaun nasional. Nia halo mós referénsia ba eleisaun demokrátika no esforsu atu hadi'a sistema saúde no edukasaun. Nia rekoñese esforsu ne'ebé Nasoins Unidas halo atu hetan dame no estabilidade iha Timor-Leste. Nia halo rekomendasaun.

69. **Nova Zelândia** subliña instituisaun nasional direitus umanus nia estatutu "A", ne'ebé hetan apoiu hosi Nova Zelândia. Nia nota katak rekomendasaun sira ne'ebé instituisaun ne'e hato'o hetan resposta tarde ka la hetan resposta. Nia observa atrazu iha ninia obrigasaun atu halo relatóriu iha tratadu direitus umanus nia âmbito. Nia afirma katak mekanizmu justisa tradisionál ladún fó protesauun ba feto ka disuazaun ba ema sira ne'ebé

halo violénsia hasoru feto. Nia mós nota katak violasaun direitus umanus ne'ebé akontese entre 1974-1999 dala barak la hetan justisa. Nova Zelândia halo rekomendasaun.

70. **Uruguai** louva polítika no medida sira ne'ebé Timor-Leste foti atu proteje direitus umanus no ninia aderénsia ba instrumentu direitus umanus lubuk ida. Uruguai fó benvindu ba Timor-Leste nia rekoñesimentu kona-ba dezafiu direitus umanus no subliña katak importante comunidade internasionál nia apoiu. Uruguai manifesta preokupasaun kona-ba norma no tradisaun kulturál ne'ebé ameasa direitu feto nian. Uruguai valoriza medida sira ne'ebé Timor-Leste foti atu promove *registro de nascimento*, no nota katak taxa ne'e sei ki'ik nafatin. Uruguai halo rekomendasaun.

71. **Slovenia** louva Timor-Leste tanba sai parte iha tratadu direitus umanus sira no tanba harii instituisaun nasional direitus umanus nian. Slovenia manifesta preokupasaun kona-ba informasaun kona-ba dezafiu no diskriminasaun ne'ebé ema deficiente sira hasoru. Slovenia hamutuk ho Komité kona-ba Eliminasaun ba Diskriminasaun hasoru Feto hodi manifesta ninia preokupasaun kona-ba feto foin sa'e sira-nia direitu ba edukasaun. Nia manifesta mós preokupasaun kona-ba diskriminasaun hasoru feto no husu ba Timor-Leste atu informa medida sira ne'ebé mak nia foti atu promove igualdade jéneru. Slovenia halo rekomendasaun.

72. **Costa Rica** fó benvindu ba Timor-Leste nia vontade atu reforsa instituisaun no programa sira iha área direitus umanus nian. Nia rekoñese progresu ne'ebé Timor-Leste halo kona-ba promosaun ba direitus umanus, liu-liu direitu labarik nian, hodi nota katak área ida-ne'e ezije esforsu maka'as, liu-liu kona-ba nutrisaun, asesu ekuitativu ba saúde no edukasaun, no kualidade edukasaun nian. Nia rekoñese medida sira ne'ebé Timor-Leste foti atu prevene tortura no halo mós rekomendasaun.

73. **España** louva Timor-Leste kona-ba prosesu ba konsolidasaun institusionál, kona-ba implementasaun ba norma no polítika sira iha area direitus umanus nian no mós kooperasaun ho sistema Nasoins Unidas nian no parte interesadu sira seluk hahú iha restaurasaun independénsia to'o ohin. Nia nota katak maske foti ona medida sira atu kombat violénsia jéneru nian, liu-liu atu implementa Lei hasoru Violénsia Doméstika (Law against Domestic Violence (LADV)), nivel aas violénsia hasoru feto, liu-liu violénsia doméstika, sai nafatin problema ida ne'ebé grave. España nota vontade ne'ebé Timor-Leste iha atu halo progresu iha área direitus umanus nian. España halo rekomendasaun.

74. Kona-ba labarik nia direitu, Timor-Leste esplika katak projetu Kódigu Labarik nian salienta kriasauun órgaun estaturáriu independente ida ho podér, entre buat seluk, atu fiskaliza Kódigu Labarik nian, atu alerta Governu kona-ba situasaun urjente sira ne'ebé mak presiza atensaun lalais no atu fó konsellu ba Governu kona-ba polítika no lejislasaun. Fó mós informasaun adisiona kona-ba dispozisaun sira hosi ezbosu Kódigu ne'e nian.

75. Ikus liu, Timor-Leste lembra katak Kódigu Sivíl foun, ne'ebé promulga iha 2011, garante direitu hanesan ba mane no ba feto iha área hotu-hotu. Nia fó informasaun ho detalle kona-ba ne'e. Kona-ba prátika tradisionál, Timor-Leste klarifika katak Konstituisaun kondisionál rekoñesimentu ba direitu konsuetudináriu ba ninia konformidade ho lei. Hafaun, nia deskreve asaun ne'ebé Governu foti atu hadi'a sistema judisiáriu liu hosi formasaun.

76. Atu ramata, Timor-Leste agradese ema hotu-hotu ne'ebé ko'alia no kontribui ba diálogo ne'e, hodi hateten katak Timor-Leste sei konsidera ho seriedade kontribuisaun sira-ne'e. Timor-Leste hateten katak nia sei halo buat hotu ne'ebé nia bele hodi fó resposta positiva ba rekomendasaun sira hodi harii sosiedade ida ne'ebé justu no di'ak liu.

II. Konkluzoan no/ka rekomendasaun**

77. Rekomendasaun sira iha lista iha kraik ne'e goza Timor-Leste nia apoiu.

- 77.1. Ratifika Konvensaun kona-ba Direitu Ema Deficiente nian (Austria);
- 77.2. Ratifika CRPD (Reino Unido da Grã-Bretanha no Irlanda Norte);
- 77.3. Halo ratifikasaun ba Konvensaun kona-ba Direitu Ema Deficiente nian (Australia);
- 77.4. Ratifika Konvensaun kona-ba Direitu Ema Deficiente nian (Slovenia);
- 77.5. Labele demora atu sai parte ba Konvensaun kona-ba Direitu Ema Deficiente nian (Nova Zelândia);
- 77.6. Bainhira bele, tenke ramata kedas política nasonal atu implementa direitus ba ema ne'ebé iha defisiensia no prosesu ratifikasaun ba Konvensaun kona-ba Direitus Ema Deficiente nian (África do Sul);
- 77.7. Asina no ratifika Konvensaun kona-ba Direitu Ema Deficiente nian (Espanha);
- 77.8. Estuda possibilidade atu ratifika Konvensaun kona-ba Direitu Ema Deficiente nian (Argentina);
- 77.9. Finaliza no adota Kódigu Labarik nian nu'udar matéria prioridade ida (Portugal);
- 77.10. Asegura katak prinsipiu sira hosi interese aas liu labarik nian reflète loloos iha lei relevante sira (Austria);
- 77.11. Komplete lalais estatutu ne'ebé fó garantia atu halo tan promosaun no protesaun ba direitus umanus, inklui promosaun no protesaun ba lei rai nian, asesu ba tribunal no kombate hasoru trafiku umanu (Indonesia)²;
- 77.12. Konsidera atu halo tan esforsu hodi hadi'a ninia lejislatura tuir ninia prioridade rasik no kapasidade nasonal, enkuantu tau iha konsiderasaun obrigasaun refere kona-ba direitus umanus (Filipina);
- 77.13. Reforsa estadu lei nian no boa governasaun, liu-liu kona-ba aplikasaun legál no kapasitasaun ba ajénsia nasonal sira direitus umanus nian (Vietnam);
- 77.14. Hasa'e rekursu umanus no finanseiru sira ba Provedoria dos Direitos Humanos e Justiça atu hadi'a protesaun ba direitus umanus (Espanha);
- 77.15. Hadi'a ninia prosesu hodi konsidera rekomendasaun sira hosi Provedoria dos Direitos Humanos e Justiça, no la bele demora atu hatán ba rekomendasaun hirak ne'e (Nova Zelândia);
- 77.16. Konsidera atu define planu asaun nasonal ida kona-ba direitu labarik nian (Austria);
- 77.17. Fó rekursu sira ne'ebé nesesáriu ba Komisaun Nasonal ba Direitu Labarik nian atu garante katak nia iha kbiit atu hala'o ninia mandatu (África do Sul);

** Konkluzoan no rekomendasaun sira la editadu.

² Rekomendasaun tuir leitura ne'ebé halo durante diálogo interativu: "Komplete lalais estatutu ne'ebé fó garantia atu halo tan promosaun no protesaun ba direitus umanus (Indonesia)".

- 77.18. Ho assisténsia hosi kooperasaun internasionál, labele demora atu implementa estratéjia globál ida ne'ebé konforma ho Konvensaun kona-ba Eliminasau ba Forma Diskriminasaun Hotu-Hotu hasoru Feto hodi emenda ka elimina prátika no estereótipu kulturál (cultural stereotypes) ne'ebé prejudika no diskrimina feto (Uruguai);
- 77.19. Asegura respeitu tomak ba feto nia igualdade direitu iha área hotu-hotu vida nian, inklui igualdade partisipasaun ba feto iha tomada desizaun (Slovenia);
- 77.20. Garante protesaun efetiva no adekuaudu ba feto sira hasoru violénsia doméstika, inklui assisténsia jurídika no abrigo (Austria);
- 77.21. Garante lejislasaun nia implementasaun efetiva atu kombate violénsia doméstika (França);
- 77.22. Fiskaliza implementasaun efetiva ba lei violénsia doméstika (Itália);
- 77.23. Halo Lei hasoru Violénsia Doméstika sai koñesidu iha funsionáriu sira no sosiedade nia leet no halo monitorizasaun ba ninia efikasía (Austria);
- 77.24. Halo tan esforsu hodi hasa'e konxiénsia kona-ba Lei hasoru Violénsia Doméstika 2010 (Law against Domestic Violence (LADV)) no hala'o ninia implementasaun total (Malázia);
- 77.25. Hasa'e rekursu umanus no tékniku sira hodi garante implementasaun efetiva ba Lei Hasoru Violénsia Doméstika (Law Against Domestic Violence (LADV)) (Espanña);
- 77.26. Mantein ninia esforsu atu halakon korrupsaun, kastigu korporál ba labarik, diskriminasaun hasoru feto no violénsia doméstika (Santa Sé);
- 77.27. Adota lejislasaun espesífika atu bandu explisitamente kastigu korporál nia forma hotu-hotu (Brazil);
- 77.28. Foti tan medida sira hasoru fenomenu tráfikku umanu ne'ebé aumenta daudaun no iha objetivu atu halo esplorasau seksuál (Algeria);
- 77.29. Adota idade mínimu atu hetan asesu ba merkadu traballu ne'ebé konforma ho padraun internasionál, liu-liu padraun hirak ne'ebé ILO nia Konvensaun kona-ba Idade Mínima define tiha ona (Espanña);
- 77.30. Bainhira bele, tenke avansa kedas ba oin hodi dezenvolve tan ninia sistema judisiál ho baze iha Planu Estratéjiku ba Setór Justisa nian (2011-2030) (Japaun);
- 77.31. Hasa'e no intensifika esforsu ne'ebé halo daudaun, liu mós hosi Centro de Formação Jurídica (Legal Training Center (CFJ)) hodi kapasita no kualifika profisaun jurídika, ne'ebé representa Pilár esensial ida ba sistema justisa nian (Portugal);
- 77.32. Hametin instituisaun judisiál sira, entre buat seluk, tau pesoál ho número suficiente no mós material (Polónia);
- 77.33. Foti medida sira lalais atu hametin instituisaun judisiál sira, liu hosi alokasaun fundus ba tribunal sira iha distritu, aumenta utilizasaun ba tribunal movel no tau ekipamentu forense adekuaudu (Ungria);
- 77.34. Halo esforsu lalais liután atu hamoos tiha atrazu iha kazu pendente sira iha Tribunal no devia to'o ona konkluzaun kona-ba estudu ne'ebé mak atu halo hodi atu hametin sistema judisiál (Irlanda);

77.35. Hametin sistema judisiál, liu-liu hosi implementasaun ba kuadru legál spesífiku ida ne'ebé regula menór sira-nia responsabilidade no ne'ebé tenke konsistente ho instrumentu internasionál sira ne'ebé eziste iha área ida-ne'e (España);

77.36. Asegura katak prinsípiu "labarik nia interese di'ak liu" tenke integra loloos iha proposta-lei kona-ba justisa juvenil no katak labarik ne'ebé iha konfliktu ho lei bele lakon de'it ninia liberdade hanesan meu ida hosi rekursu ikus liu (Noruega);

77.37. Halo esforsu sériu atu asegura katak ema hotu-hotu iha asesu ba rekursu jurídiku ba violasaun direitus umanus, liu hosi sistema justisa formal, liu-liu ba ema sira ne'ebé hela iha distritu no area rural (República Koreaia);

77.38. Halo esforsu boot liu atu asegura katak vítima sira hosi violasaun direitus umanus, dala barak feto no labarik, bele ezerse sira-nia direitu atu hetan reparasaun iha sistema justisa formál, no atu prevene kualkér prátika ne'ebé la tuir padraun internasionál direitus umanus (República Koreaia);

77.39. Foti medida sira foun atu promove asesu ba justisa, liu-liu ba comunidade rural no feto sira (Algeria);

77.40. Halo tan esforsu atu promove rejistu sivíl ba populasaun Timor-Leste, liu-liu ba labarik sira (Brazil);

77.41. Hadi'a sistema *rejisto de nascimento*, no halo mós esforsu maka'as atu halo sensibilizasaun no mobiliza opiniaun pública kona-ba vantajen *rejisto de nascimento* nian iha prosesu atu estabelese labarik sira-nia identidade no atu ezerse sira-nia direitu, hanesan prevee iha artigu 7 hosi Konvensaun kona-ba Direitu Labarik nian no ho apoiu hosi comunidade internasionál (Uruguai);

77.42. Intensifika programa sira atu kombat dezempregu no kiak (Algeria);

77.43. Implementa lalais polítika no medida sira hodi promove no proteje direitu sosiál no ekonómiku báziku; iha ne'e, dezafiu prinsipál mak hanesan kontrole ba moras, eliminasaun ba analfabetizmu, redusaun ba kiak no seguransa ai-han nian (Vietnam);

77.44. Halo tan esforsu atu responde ba dezafiu atu sustenta no hadi'a povu nia kondisaun moris no oportunidade empregu iha área rural (República Demokrátika Popular Laos);

77.45. Adota lalais medida sira atu hadi'a asesu ba servisu saúde nian, liu-liu iha comunidade sira ne'ebé hela iha fatin dook (Costa Rica);

77.46. Konsulta no envolve NGO sira no mós sosiedade sivíl iha prosesu akompañamentu ba UPR (Austria).

78. Rekomendasaun sira tuir mai ne'e, ne'ebé nia konsidera katak nia implementa tiha ona ka sei iha prosesu implementasaun nia laran, goza Timor-Leste nia apoiu:

78.1. Koopera nafatin ho Nasoins Unidas no organizaun internasionál sira seluk atu dezenvolve ninia kuadru institusionál no legál kona-ba promosaun no protesau ba Direitus Umanus iha Timor-Leste (República Demokrátika Popular Laos);

78.2. Harii no hametin nafatin mekanizmu demokrátiku iha nasaun ne'e, inklui ninia instituisaun judisiál sira, no kria mekanizmu institusionál hotu-hotu ne'ebé nesésáriu atu proteje populasaun vulneravel hosi abuzu ne'ebé de'it (Nepal);

- 78.3. Konsidera atu halo elaborasaun ba planu asaun nasional ida abranjente ba direitus umanus (Indonesia);
- 78.4. Hasa'e no hametin nivel koñesimentu públiku kona-ba lei no mekanizmu sira ne'ebé iha hodi hametin direitus umanus, liu-liu iha fetu no fetu foin sa'e sira-nia leet (Portugal);
- 78.5. Hasa'e tan kooperasaun rejionál no internasionál kona-ba direitus umanus, liu-liu ho nasaun sira iha ASEAN no ho Konsellu Direitus Umanus (Vietnam);
- 78.6. Hametin nafatin estratéjia atu halakon violénsia hasoru fetu, asegura katak fetu sira goza kapasidade legál hanesan ho mane sira, no rezolve diferença jéneru ne'ebé fetu barak enfrenta iha merkadu empregu nian (Japaun);
- 78.7. Halo nafatin esforsu atu asegura igualdade jéneru no fetu nia partisipasaun iha instituisaun públika, inklui instituisaun lokál sira, no mós iha setór privadu (España);
- 78.8. Organiza kampaña ho objetivu atu promove igualdade jéneru no atu reforsa mekanizmu ne'ebé iha hodi kombate no fó kastigu ba ema ne'ebé halo violénsia hasoru fetu (Brazil);
- 78.9. Mantein esforsu ne'ebé nia halo atu prevene, fó kastigu no halakon forma violénsia hotu-hotu hasoru fetu no mós esforsu ne'ebé nia halo atu garante igualdade no asegura rekoñesimentu hanesan entre fetu no mane iha lei direitu sivíl, polítiku, ekonómiku no sosiál (Argentina);
- 78.10. Kombate violénsia doméstika no diskriminasaun ba fetu liu hosi sensibilizasaun kona-ba jéneru iha setór estratéjiku sira-nia laran (Noruega);
- 78.11. Reforsa no identifika asaun atu kombate violénsia doméstika (Portugal);
- 78.12. Mantein esforsu ne'ebé halo daudaun atu kombate prátika violénsia doméstika (Mozambique);
- 78.13. Kontinua halo abordajen abranjente, liu hosi ninia lei no justisa, sociedade sivíl no programa saúde nian, atu rezolve insidénsia aas violénsia doméstika nia, liu-liu reforsa fetu nia asesu ba sistema justisa formál (Australia);
- 78.14. Halo tan esforsu atu hasa'e públiku nia konxiénsia, no liu-liu órgaun sira ne'ebé aplika lei, katak tenke trata violénsia doméstika hanesan krime públiku ida ne'ebé grave (Repúblika Koreia);
- 78.15. Implementa efetivamente Lei hasoru Violénsia Doméstika, liu hosi aumentu koñesimentu kona-ba lei ne'e iha funsionáriu públiku sira nia leet, lider komunitáriu sira, no liu hosi edukasaun kona-ba sidadania; aleinde ne'e, dezenkoraja prátika kulturál ne'ebé viola fetu nia direitu, hanesan kazamentu forsadu ka kazamentu sedu (Alemaña);
- 78.16. Foti medida sira hodi apoia implementasaun ba ninia Lei hasoru Violénsia Doméstika, inklui formasaun ba ajente sira ne'ebé aplika lei kona-ba violénsia seksuál (Canada);
- 78.17. Formasaun abranjente ba professor sira kona-ba dixiplina pozitiva (Ungria);

- 78.18. Buka kooperasaun hosi ajénsia sira Nasoins Unidas nian, hanesan ILO, atu kombat traballu infantíl (Brazil);
- 78.19. Halo nafatin esforsu konjuntu no benefísiu ba parte rua hotu atu implementa planu asaun hodi implementa rekomendasaun sira hosi CTF (Indonesia);
- 78.20. Hametin nafatin responsabilizasaun iha setór seguransa, liu-liu kona-ba uza forsa ne'ebé maka'as liu no abuzu autoridade hosi polisia no militar sira (Repúblika Korea);
- 78.21. Liu hosi formasaun no konsolidasaun ba kontrolu sivíl ba forsa seguransa nian, asegura katak polisia no militar sira respeita direitus umanus no prevene violasaun direitus umanus, liu-liu tratamentu-aat no uza forsa ne'ebé maka'as liu (França);
- 78.22. Fó nafatin formasaun adekuaudu, liu-liu kona-ba direitus umanus, ba polisia nasionál no forsa defeza (Australia);
- 78.23. Buka asisténsia téknika hosi doador internasionál sira, inklui ajénsia relevante sira no fundus Nasoins Unidas nian, hodi halo kapasitasaun ba funcionáriu públiku sira, liu-liu pesoál ne'ebé aplika lei, pesoál jurídiku no judisiáriu (Malázia);
- 78.24. Fó nafatin apoiu no halo nafatin kooperasaun ho UNDP iha projetu hirak ne'ebé buka atu hametin kapasidade institucionál sistema justisa nian (Noruega);
- 78.25. Define idade mínima ba kazamentu iha liña ho padraun internasionál (Itália);
- 78.26. Halo liután esforsu atu kombaté kiak, liu hosi introdusaun estratéjia nasionál abranjente hodi aloka tan rekursu sira iha servisu sosiál ba grupu vulneravel sira ne'ebé moris iha área rural, no halo liután esforsu atu Satan diskriminasaun hasoru fetu iha area hotu-hotu (Myanmar);
- 78.27. Kontinua kombaté kiak, liu hosi apoiu ativu hosi comunidade internasionál no liu hosi konsolidasaun ba kapasidade atu implementa no halo monitorizasaun ba estratéjia atu hamenus kiak iha nivel lokál no komunitáriu (Colombia);
- 78.28. Mantein firme hodi implementa ninia kometimentu atu hametin programa oin-oin ne'ebé kria atu elimina kiak no asegura asesu universál ba servisu públiku, maske limitasaun ne'ebé eziste iha nivel saúde, edukasaun, habit asaun, nutrisaun no área sira seluk ne'ebé iha relasaun ho direitus umanus, no buka apoiu hosi comunidade internasionál atu implementa projetu sira iha área hirak ne'e (Marrocos);
- 78.29. Halo nafatin esforsu atu dezenvolve infra-estrutura global iha nasaun ne'e no fó nafatin kapasitasaun ba ninia pesoál atu asegura resposta ba povu nia nesidade bázika, liu-liu ai-han, enerjia, edukasaun, saúde no asesu ba justisa (Tailândia);
- 78.30. Halo nafatin esforsu atu dezenvolve polítika no programa sira ne'ebé kria atu hamenus malnutrisaun iha nasaun ne'e, liu-liu hadi'a programa kona-ba ai-han iha eskola (Costa Rica);
- 78.31. Implementa nafatin polítika no programa efetivu sira ho objetivu atu hadi'a povu nia saúde, edukasaun, kondisaun moris no asesu ba bee-moos no saneamentu (Malázia);

- 78.32. Hadi'a nafatin sistema saúde nian no edukasaun (Santa Sé);
- 78.33. Implementa nafatin estratéjia no planu sira hodi halo dezenvolvimentu sosiál no ekonómiku iha nasaun ne'e atu alkansa Objektivu Dezenvolvimentu Milénio nian to'o 2015 (Cuba);
- 78.34. Implementa nafatin ninia kampaña no programa sira ne'ebé iha relasaun ho saúde hodi hadi'a nivel saúde públika no fó asesu ba ema hotu atu hetan servisu saúde nian, ho comunidade internasionál nia apoiu (Singapura);
- 78.35. Reforsa tan iniciativa atu mobiliza asisténsia no rekursu sira esternu atu kombate infesaun mear-raan, malária no kabun-moras ka diarreja (Mozambique);
- 78.36. Halo nafatin esforsu atu hametin ninia sistema edukasaun tuir Lei Bázika kona-ba Edukasaun (Singapura);
- 78.37. Implementa tan Planu Estratéjiku Nasionál 2011-2013 kona-ba Edukasaun (Indonesia);
- 78.38. Halo nafatin esforsu atu bele oferese edukasaun universál ba ema hotu, liu hosi dezenvolvimentu ba instituisaun edukasaun primária barak liután no liu mós hosi apoiu ba labarik sira ne'ebé iha dezvantajen ekonómika no vulneravel, no fó apoiu ba labarik deficiente sira (Costa Rica);
- 78.39. Foti medida sira atu hadi'a qualidade iha edukasaun hodi hatán ba taxa matríkula ne'ebé ki'ik hosi feto estudante sira iha eskola sekundária no superior (Japaun);
- 78.40. Asegura katak programa edukasaun fó atensaun espesial ba prevensaun hasoru abuzu seksuál no persegisaun no fó kbiit ba feto sira atu fila ba eskola hafoin tuur tiha ahi (Reino Unido da Grã-Bretanha no Irlanda Norte);
- 78.41. Halo esforsu nafatin atu promove no proteje ema vulneravel sira-nia direitus umanus (Indonesia);
- 78.42. Dezenvolve nafatin parseria ho nasaun no organizaun amigu sira, no buka dalan hotu-hotu ne'ebé iha atu koopera, iha nivel bilateral, rejional ka internasionál, hodi hadi'a nasaun ne'e nia kapasidade no hametin ninia poder umanu hodi bele loka dalan ba povu Timor-Leste atu goza tomak ninia direitu (Filipinas);
79. Timor-Leste sei ezamina rekomendasaun sira tuir mai ne'e no sei fó resposta ba rekomendasaun hirak ne'e iha prazu ida nia laran, maibé prazu ne'e la bele liu Marsu 2012 bainhira Konsellu Direitus Umanus hala'o ninia sesaun ba dala sanulu-resin-sia:
- 79.1. Ratifika ka adere, se apropriadu, ba Primeiru Protokolu Opsional ba Pakto Internasionál kona-ba Direitu Sivíl no Polítiku, Protokolu Opsional ba Konvensaun hasoru Tortura no Tratamentu ka Kastigu sira seluk ne'ebé Kruél, Dezumanu ka Degradante, Protokolu Opsional ba Pakto Internasionál kona-ba Direitu Ekonómiku, Sosiál no Kulturál no mós Konvensaun Internasionál kona-ba Protesaun ba Ema Hotu hosi Desaparecimento Forsadu (Uruguai);
- 79.2. Ratifika Protokolu Opsional ba Konvensaun kona-ba Direitu Ema Deficiente nian no Primeiru Protokolu Opsional ba Pakto Internasionál kona-ba Direitu Sivíl no Polítiku (Austria);

- 79.3. Ratifika Protokolu Opsional ba Konvensaun hasoru Tortura no adere ba Konvensaun Internasionál kona-ba Protesaun ba Ema Hotu hosi Desaparesimentu Forsadu (França);
- 79.4. Ratifika Primeiru Protokolu Opsional ba Paktu Internasionál kona-ba Direitu Sivíl no Polítiku (Polónia);
- 79.5. Ratifika Protokolu Opsional ba Konvensaun hasoru Tortura (Optional Protocol to the Convention against Torture (OP CAT)), ne'ebé asina iha 2005 (Estonia);
- 79.6. Ratifika OPCAT (Reino Unido da Grã-Bretanha no Irlanda Norte);
- 79.7. Asina no ratifika Konvensaun Internasionál kona-ba Protesaun ba Ema Hotu hosi Desaparesimento Forsadu (Espanña);
- 79.8. Estuda possibilidade atu ratifika Protokolu Opsional ba Konvensaun kona-ba Direitu Ema deficiente nian no Konvensaun Internasionál kona-ba Protesaun ba Ema Hotu hosi Desaparesimento Forsadu (Argentina);
- 79.9. Asegura implementasaun ba Estatutu Roma nia dispozisaun sira iha lei nasional (Ungria);
- 79.10. Halo lalais esforsu ho objetivu atu implementa ho plena aplikasaun ba ninia planu asaun no política relevante sira, inklui lejizlasaun anti-tráfiku (Kamboja);
- 79.11. Emenda estatutu hosi Komisaun Nasional Direitus Labarik nian (National Children's Rights Commission (NCRC)) hodi bele inklui kompeténsia legál atu halo intervensaun institusionál hasoru ministériu sira ne'ebé halo servisu kona-ba direitu labarik nian no simu keixa kona-ba violasaun ba direitus (Noruega);
- 79.12. Bainhira bele, tenke apresenta kedas relatóriu hodi kumpre nune'e ninia obrigasaun perante órgaun tratadu respetivu (Austria);
- 79.13. Apresenta lalais relatóriu ba mekanizmu direitus umanu sira, liu-liu bainhira relatóriu inisiál sira liu tiha ona prazu (Estonia);
- 79.14. Foti medida konkreta hodi hala'o lalais prosesu relatóriu nian ba relatóriu tratadu ne'ebé liu ona prazu no inklui parte interesadu hotu-hotu iha prosesu ida ne'ebé transparente (Noruega);
- 79.15. Fó prioridade atu apresenta relatóriu periódiku kona-ba tratadu sira ne'ebé mak sei dauk hatu'o relatóriu ba (Nova Zelândia);
- 79.16. Emite konvite permanente ba titular sira hosi mandatu prosedimentu espesial HRC nian (Brazil);
- 79.17. Emite konvite permanente ba Konsellu Direitus Umanus nia prosedimentu espesial hotu-hotu (Austria);
- 79.18. Emite konvite permanente ba titular sira hosi mandatu prosedimentu espesial nian (Slovenia);
- 79.19. Konsidera atu emite konvite permanente ba titular hotu-hotu hosi mandatu kona-ba prosedimentu espesial sira (República Koreaia);
- 79.20. Halo revizaun ba lejizlasaun ne'ebé iha konsekuénsia diskriminatória hasoru feto (Italia);

- 79.21. Mantein ninia esforsu atu proteje vida umana hosi konsepsaun to'õ mate natural (Sante Sé);
- 79.22. Hatán atu fó prioridade boot liu ba investigasaun no ba prosesu judisiál kona-ba kazu violénsia doméstika sira (Nova Zelândia);
- 79.23. Foti medida konkreta atu garante katak halo duni justisa ba vítima sira ne'ebé hetan abuzu direitus umanus durante tempu funu nian ba independénsia, no mós ba sira-nia família no sobrevivente sira (França);
- 79.24. Halo nafatin esforsu ho objetivu atu promove lia-loos, justisa no reparasaun ba violasaun grave direitus umanus ne'ebé komete entre 1974 no 1999 (Argentina);
- 79.25. Rezolve violasaun sira ne'ebé akontese iha tempu liu ba no fó korajen ba prosesu parlamentár loloos kona-ba proposta-lei sira hodi asegura estabilidade polítika no hamenus tensaun sosiál interna (Noruega);
- 79.26. Buka halo lejislasaun hodi regula koerénsia prezidensiál atu hasa'e transparénsia no fó oportunidade ba vítima no prokuradór sira atu partisipa iha prosesu ne'e (Canada);
- 79.27. Garante akompañamentu efetivu ba rekomendasaun sira hosi Comissão de Acolhimento, Verdade e Reconciliação no Comissão de Verdade e Amizade no ba sira-nia implementasaun (Australia);
- 79.28. Adota rekomendasaun hosi CAVR no CTF, inklui programa reparasaun ba vítima sira ne'ebé hetan violasaun direitus umanus iha tempu liu ba (Canada);
- 79.29. Fó prioridade hodi implementa CAVR no CTF nia rekomendasaun kona-ba vítima-nia direitu atu hetan justisa, lia-loos no reparasaun (Nova Zelândia);
- 79.30. Halo tan progresu kona-ba akompañamentu ba servisu ne'ebé CAVR no Comissão de Verdade e Amizade halo – liu-liu ho relasaun ba lejislasaun atu halo reparasaun ba vítima sira ne'ebé hetan abuzu iha tempu liu ba no harii “Instituto Memorial” ida (Reino Unido da Gra Bretanha no Irlanda Norte);
- 79.31. Asegura katak tenke halo implementasaun ba Comissão de Acolhimento, Verdade e Reconciliação-nia rekomendasaun sira no tenke fó apoiu nesásiu ba vítima sira ne'ebé hetan violasaun direitus umanus iha tempu liu ba (África do Sul);
- 79.32. Hametin tan instituisaun judisiál sira, liu hosi melloramento ba defensór públiku no prokuradór sira-nia remunerasaun no foti medida sira atu hamenus kazu pendente sira (Alemaña);
- 79.33. Halo nafatin konsulta ho UNICEF no NCRC iha prosesu atu ramata proposta-lei kona-ba justisa juveníl atu asegura katak lei ne'e klaru no katak prosesu ne'e apropriadu no tau iha konsiderasaun kontestu lokál no rekursu sira ne'ebé iha (Noruega);
- 79.34. Salva guarda instituisaun família nian no kazamentu nu'udar uniaun entre mane ida ho feto ida, bazeia ba sira-nia konsentimentu livre (Santa Se);
- 79.35. Ho asisténsia no kooperasaun internasionál urjente no sein kondisionalizmu, hametin nafatin ninia polítika iha area edukasaun no saúde hodi bele oferese servisu sosiál báziku ba ninia povu, iha maneira ida ne'ebé

garante igualdade asesu, ho atensaun espesial ba setór sira ne'ebé vulneravel liu iha comunidade nia leet (Venezuela);

79.36. Hametin Governu nia resposta ba insidente sira hosi violénsia hasoru membru sira iha grupu relijiozu minoritáriu sira (Canada);

80. Rekomendasaun ida iha kraik ne'e la goza apoiu hosi Timor-Leste.

80.1. Elimina dispozisaun sira iha ninia lejizlasaun ne'ebé halo diskriminasaun hasoru fetu, inklui fetu nia direitu ba eransa, na'in ba rai no kapasidade legál (Canada);

81. Konkluzsaun no rekomendasaun hotu-hotu iha relatóriu ida-ne'e reflète pozisaun hosi Estadu sira ne'ebé submete no Estadu ne'ebé halo revizaun ba. Labele interpreta hanesan sira hetan aprovasaun hosi Grupu Traballu tomak.

Aneksu

Kompozisaun delegasaun nian

Delegasaun Timor-Leste lidera hosi S.Exa Lucia Maria Brandão F. Lobato, Ministra da Justiça, adere no kompostu hosi membru sira tuir mai ne'e:

S.Exa. Joaquim A.M.L. da Fonseca, Embaixador/Representante Permanente República Demokrátika Timor-Leste nian ba Eskritóriu Nasoins Unidas nian no Organizasaun Internasionál sira seluk iha Jenebra;

Sr. Eugenio João A. de Maria Soares, Diretor-Jerál, Ministério da Solidariedade Social;

Sr. Apolinario Magno, Diretor-Jerál, Ministério da Educação;

Sr. Celito Cardoso, Diretor Nasionál, Direitus Umanus no Sidania, Ministério da Justiça;

Sra. Milena Rangel, Diretora Nasionál, Assuntos Multiculturais, Ministério dos Negócios Estrangeiros;

Sr. Helder Godinho Martins, Diretor Departamentu Direitus Umanus, Ministério da Justiça;

Sr. Augusto dos Santos da Costa, Secretaria de Estado da Formação Profissional e Emprego;

Sr. Florencio Pina Dias Gonzaga, Pontu Fokál ba Direitus Umanus, Ministério da Solidariedade Social;

Sr. Anacleto da Costa Ribeiro, Konselleiru ba Secretaria do Estado da Segurança;

Sr. Quirino Antoninho Araujo Soares Agosto, Sekretáriu Ministra da Justiça nian;

Sr. Miguel Lemos, Konselleiru Ministra da Justiça nian;

Sra. Kavita Desai, Konselleira ba Misaun Permanente República Demokrátika Timor-Leste nian iha Nasoins Unidas
